

FASNACHT

2021

D`Fasnacht 2021 wird scho zur Gschicht
Bevor dieä richtig a`bricht
Corona hed das Ganzi zum Kippä brungä
Behördä hed sich leider zurä Absag durä grungä

Heisst de hald ganz eifach gseid
D`Fasnacht wird us gsundheilicher Sicht, abgseid
Gsundheit gahd vor, isch klar
Tatsach und letschdlich ai wahr

Keini Guggä Äläss und Fäschtllichkeitä
Diend eys im Alltag begleitä
Kei Maskäbäll und keis Narrätreybä, nei
Mä bleybd eifach. ugschminkt derhei

Keini Wägä wärdid baschtled und erstellt
Wo Jahres Begäbäheitä nu einisch wurdid erheld
Kei Fotzilirägä
Kei Konfetti wo Gmeindsarbeiter mend äwäg trägä

Kei Oranschä wo umä fleygid und gfängä wärdid vo der Chind
Kei Kaffee Schnaps wo Gurggelä fild
Kei Tagwach und kei Morgä- Streich
Churzum, dass isch scho ä Seich

Ai bi de Deytschä gids kei Püttä Gspäss und ä so
Wo susch allig bhabä diend der tharä cho
Det heisst fir einisch nid, Narrä und Narrälesä
Mit dreyfach hoch, isch nix gewesä


Keini Tänz vo der Funkämarichen, ja nei
Wo allig zeigid ihri straffä Bei
Keini Prinzä Paar
Im Corona Jahr

Ai Basler med ihri Mählsuppä sälber tringgä
Das wird ai i denn stinggä
Diä wärdid sägä, ey jo
Mier diend nägscht Jahr wieder gho

Wemä dängt, wennä dängt
Was Coronä alles versängt
He jo der no
Das isch e so

D`Luzärner mit ihrem Kaffee Huär Aff
Sind ai ordeli paff
Sie mend dä Ziber vollä Schwarzes, äs isch zum schiessä
Zum wäschä bruichä vo ihrnä Fiässä

Schminki, Konvetti und nu so Sachä



FASNACHT

2021

Mit dem chaisch heyr kei Umsatz machä
Fasnachtsgwändli lismä muäsch ai nid
Wills abä kei Aläss gid

Schmutzigä Dunnschtig neyd los
Geyggumändig, Geygguzeyschtig ai nyd famos
Der zwisched innä laift ai neiwä wenig
Zur beyträigig vo der Fasnachts- chrenning

Ja äs isch scho cheibä bled
Wemmer niemmer mit Maskierig gsehd
Also halt, das stimmt ja gar nid
Äs doch ä durgändi staatlich verhänti Maskäpflicht gid

Am Äscheli Mittwoch de
Chämmid id Chilä go Äschä holä ordeli meh
Will alli sind niechter und bi Verstand
Vom der heimä bleybä, logisch, leyd ja uf der Hand
Gad aber äbä ai nu wieder nid
Wills nur für fufzg Personä, is Vaterunser Silo ilass gid

Nach der Narrätäg isches allig ä so
Das d`Faschtäzeyt duät nachä cho
Zum bsinnä, hungerä und i sich i cherä
Deig so zum Chrischtätum gherä

Heyr so chammä hoffä
Sind aber Papa Romas Chnächttä chley offä
G`faschtet hemmer jetz abem Dezämber ja gnuäg bimeid
Jetzt sett diä Zeyt cho vo Fäscht, uistobä und fleischlicher Freid

Der Papscht verschiebt hoffentlich diä feyfti Jahreszeyt
Det anä wo suscht Faschtä agseid wär fir alli Leyt
De isch de Ramba Zamba erlaibt und Pflicht ai
Und statt Maskäpflicht gilt „Unverhüllt für Maa und Frai“

Oder owi gand als Faschtä Seckli dekorierd
I der Hoffnig das für Corona- Plageti epper eppis innä rierd
Diä Batzä und d`Netli diend Staatsschuldä milder ha
Chusch de i Himmel, irgend einsch na

So fertig phoetisch umä gschränzt
A derä Fasnacht wird einisch, gschwänzt
D Fiäss stillä, neyd tänzig
Äs läbt Fasnacht zweizweiäzwänzig

**Im Jahr der Fasnachts - Trauer
Migi Zumbühl**

